

**LAVINA****SIPA** uhapsila osumnjičene za kriminal u Bobar i IR banci

Injac i Vujnić "pale" na nezakonitim kreditima

Počinioci su davali kredite i bankarske garancije bez poštivanja propisanih procedura, plasirane preduzećima i privrednim subjektima koji su povezani ili su suvlasnici Bobar banke

PIŠE MLADEN DRAGOJLOVIĆ

Direktorica Agencije za bankarstvo RS-a Slavica Injac i direktorica Investiciono-razvojnog banke ovog entiteta Snežana Vujnić, uhapšene su u akciji **SIPA-e** pod nazivom „Lavina“. One su jučer odvedene u službene prostorije na ispitivanje u vezi sa kriminalom u bijeljinskoj Bobar banci.

Akcija je provedena nakon višemjesečne istrage u Banjoj Luci, Zvorniku i Bijeljini. Uhapšeno je ukupno desetak osoba. Injac i Vujnić su uhapšene na svojim radnim mjestima, a pretresi prostorija ove dvije institucije u Banjoj Luci trajali su od ranih jutarnjih sati do popodne. Akcija je počela odmah nakon ulaska radnika u kancelarije, a odmah nakon

njih ušli su i radnici **SIPA-e**. Nakon pretresa direktorice su odvedene iz prostorija službenim automobilima **SIPA-e**.

Zločinačko udruženje

Istraga u slučaju Bobar banke počela je odmah nakon smrti Gavriela Bobara, čovjeka koji je bio jedan od povjerljivih ljudi vrha SNSD-a, kada je primijećeno da u depozitima banke nedostaje višemilionski iznos novca.

- Ni tada ne bi bilo velike istrage i vjerovatno bi sve bilo zataškano da jedan od klijenata banke, koji je imao skoro milion maraka u depozitu, nije nakon kraha banke dobio 50.000 maraka. Kada je pitao šta je sa ostatkom, rečeno mu je da ga najvjerovatnije nikada neće vidjeti. To je prevagnulo i prijavio je slučaj **SIPA-i** - rekao je Faktorov izvor.

On dodaje da su pretresi i hapšenja u ovom slučaju sasvim normalna stvar koja se mogla očekivati i ranije. Čudi ga, kaže, da su Injac i Vujnić ostale na svojim radnim mjestima i da nisu ranije smjenjene.

Iz Tužilaštva BiH se navodi da se uhapšene osobe sumjiče da su kao grupa pripadnika međusobno povezanog i organizovanog zločinačkog udruženja, djelujući u međusobnom dogovoru, počinili niz nezakonitosti u poslovanju Bobar banke, prvenstveno u dodjeli kredita u višemilionskim iznosima, kao i nezakonitih bankarskih garancija za razne poslove, uz kršenja procedura i garancija propisanih Zakonom o bankama RS-a, te su na taj način nanijeli štetu i omogućili stjecanje nezakonite imovinske koristi u iznosu od oko 123 miliona maraka.

Kreditni rejting

- Počinioci su davali kredite i bankarske garancije bez poštivanja zakonom propisanih procedura, plasirane preduzećima i privrednim subjektima različitih vlasnika koji su povezani ili su suvlasnici Bobar banke, te su znali da se naplata sredstava neće moći realizovati i da su korištene nezakonite garancije, te da će nastupiti šteta, koja će prouzročiti stečaj navedene banke i ozbiljne potrese u bankarskom sektoru BiH - navode u Tužilaštvu.

Tužilaštvo navodi da su ovakve nezakonite aktivnosti nanijele veliku štetu kreditnom rejtingu naše zemlje i dovele do toga da se MMF aktivno uključi u analizu dešavanja u bankarskom sektoru.

- Također, ovakvim aktivnostima su ugroženi depoziti različitih pravnih i fizičkih osoba, koji su bili deponovani u Bobar banci, uključujući sredstva gradova, općina, preduzeća, zdravstvenih zavoda, PIO fondova, elektroprivreda, fizičkih osoba te je nanesena višemilionska šteta Agenciji za osiguranje depozita BiH - ističe Tužilaštvo BiH.

Iz **SIPA-e** je potvrđeno da će svi uhapšeni biti prevezeni u centralu Agencije u Istočnom Sarajevu gdje će biti obavljeno ispitivanje.

PRIPADNICI SIPA-e U "AUTOSEMBERIJI"**Uhapšen Petar Cacanović**

Pripadnici **SIPA-e** upali su u četvrtak ujutro i u poslovne prostorije „Autosemberije“, jednog od preduzeća iz sastava Bobar Group. Direktor „Autosemberije“ Darko Jeremić, koji je navodno trebao biti uhapšen, nije u tom trenutku bio u prostorijama ovog preduzeća.

U jučerašnjoj akciji **SIPA-e** u Bijeljini su uhapšeni Petar Cacanović, dugogodišnji direktor Bobar banke u likvidaciji, Ana Miroslavljević, koja je direktorsku funkciju obavljala prije likvidacije Bobar banke, te službenici banke Radmila Đuričić, Sonja Kurtuma, Batrić Đutišić i Zdravko Dubov. L.J.L.J.

INSTITUCIJE RADE SVOJ POSAO**Šukalo: Nismo iznenađeni**

Predsjednik opozicione Napredne Srpske Adam Šukalo, rekao je u Banjoj Luci da ga akcija **SIPA-e** ne iznenađuje.

- Ovo pokazuje da institucije rade svoj posao i očekujemo da se istraga proširi prema ministru financija RS-a Zoranu Tegeltiji, koji je indirektno odgovoran za rad obje pretresene institucije. Brine nas činjenica da su tužilaštva u BiH još uvijek pod političkom kontrolom i da, ukoliko se predmeti ne pripreme kako treba, neko od uhapšenih može biti oslobođen - rekao je Šukalo.

MILORAD DODIK O HAPŠENJIMA

Očekivane izjave

Predsjednik RS-a Milorad Dodik rekao je da je akcija SI-PA-e pokazala bespotrebnu manifestaciju sile i političku obojenost u cjelini **SIPA-e** i Tužilaštva BiH i naglasio da je uvjeren da su zaposleni u Agenciji za bankarstvo RS-a i u Investiciono-razvojnoj banci radili u skladu sa zakonom.

-Upadanje **SIPA-e** u institucije RS-a nije ništa drugo nego manifestacija te grubosti i dokaz svima da nam ovakva BiH sa ovakvim institucijama uopće ne treba - bio je Dodikov očekivani komentar.



INJAC I VUJnić: Uhapšene na radnim mjestima



Pripadnici SIPA-e jučer u Banjoj Luci

